



**PRAVILA STUDIRANJA
ZA TREĆI CIKLUS STUDIJA**

Sarajevo, august 2018.

Na osnovu člana 56. Zakona o visokom obrazovanju ("Službene novine Kantona Sarajevo", broj: 33/17), a u vezi sa članom 135. Statuta visokoškolske ustanove Internacionalni Burč univerzitet – International Burch University, br.: 01-89-1/18 od 28.03.2018. godine, Senat Internacionalnog Burč univerziteta na svojoj CLVII sjednici, održanoj 29.08.2018. godine donio je

PRAVILA STUDIRANJA ZA TREĆI CIKLUS STUDIJA NA VISOKOŠKOLSKOJ USTANOVI INTERNACIONALNI BURČ UNIVERZITET – INTERNATIONAL BURCH UNIVERSITY

I OPĆE ODREDBE

Član 1. (Predmet i definicija)

- (1) Pravilima studiranja trećeg ciklusa studija visokoškolske ustanove Internacionalni Burč univerzitet – International Burch University (u daljem tekstu: Pravila) uređuju se ciljevi doktorskog studija, upis na studij trećeg ciklusa, organizacija i načini izvođenja trećeg ciklusa studija, organizacija zajedničkih i interdisciplinarnih programa, vrednovanje rada studenata, gubitak statusa studenta, trajanje studija, postupak imenovanja mentora, prijave i odbrane doktorske disertacije, kao i druga pitanja od značaja za realizaciju studija za sticanje naučnog zvanja doktora nauka/umjetnosti na visokoškolskoj ustanovi Internacionalni Burč univerzitet – International Burch University (u daljem tekstu: Univerzitet).
- (2) Trećim ciklusom studija smatra se svaki studijski program koji daje pravo na sticanje diplome akademske titule i naučnog zvanja doktora nauka za određenu oblast, u skladu sa Zakonom, ovim Pravilima i Pravilnikom o korištenju akademskih titula i sticanju naučnih i stručnih zvanja na visokoškolskim ustanovama u Kantonu Sarajevo.

II CILJEVI DOKTORSKOG STUDIJA

Član 2. (Ciljevi studija)

- (1) Cilj doktorskog programa je da studenti provedu samostalno istraživanja, izražavajući svoje mišljenje u pogledu naučnih dostignuća, te poduzmu potrebne korake u cilju dosezanja novih naučnih sinteza.
- (2) Doktorska disertacija mora ispuniti jedan od sljedećih uslova:
 - a) pokazati novi pristup polju istraživanja,
 - b) koristiti novi naučni metod/pristup ili
 - c) primijeniti postojeći metod na novo polje istraživanja.
- (3) Nakon završetka trećeg ciklusa studija student:
 - a) pokazuje sposobnost samostalnog istraživačkog rada u oblasti studija, te samostalnost primjene vještina i metoda istraživanja u svojoj oblasti;
 - b) pokazuje sposobnost sintetiziranja, eksplikacije, oblikovanja, primjenjivanja, dizajniranja, implementacije i prihvatanja procesa zasnovanih na nauci;

- c) originalnim istraživanjem doprinosi proširenju granica znanja naučnim radom, čiji pojedini dijelovi zaslužuju objavu u domaćim i međunarodno referentnim publikacijama;
- d) sposoban je za kritičku analizu, evaluaciju i sintezu novih i kompleksnih ideja;
- e) promovira, u akademskom i profesionalnom kontekstu, tehnološki, društveni ili kulturni napredak u društvu zasnovanom na znanju.

III UPIS

Član 3. (Upis na treći ciklus studija)

- (1) Upis na treći ciklus studija vrši se na osnovu javnog konkursa koji objavljuje Univerzitet, o čemu odluku donosi Senat Univerziteta.
- (2) Broj studenata za upis na treći ciklus studija utvrđuje Senat Univerziteta, uz saglasnost osnivača Univerziteta.
- (3) Pravo upisa na treći ciklus studija imaju kandidati sa završenim drugim ciklusom studija.
- (4) Kandidat koji je ispunio uslov iz stava (3) ovog člana ima pravo upisa i na programe iz drugih oblasti koje se razlikuju od oblasti studijskog programa prvog i drugog ciklusa studija koji je završio, pod uslovima koje utvrdi vijeće.
- (5) Kandidatima koji su stekli titulu magistra nauka/umjetnosti prije uvođenja bolonjskog sistema trocikličnog studija i iz oblasti koje su odgovarajuće za oblast iz koje se organizira studij trećeg ciklusa, priznaje se 60 ECTS studijskih bodova.
- (6) U slučaju iz stava (5) ovog člana, vijeće organizacione jedinice (u daljem tekstu: vijeće) imenuje posebnu komisiju koja utvrđuje relevantnost stečene titule magistra nauka/umjetnosti sa odgovarajućim studijskim programom na trećem ciklusu studija.
- (7) Na osnovu izvještaja komisije iz prethodnog stava, vijeće donosi odluku o prijemu kandidata na studij trećeg ciklusa.
- (8) Rangiranje kandidata vrši se na osnovu posebne odluke koju usvaja Senat Univerziteta prije raspisivanja konkursa za upis na treći ciklus studija.

Član 4. (Poznavanje engleskog jezika)

- (1) Nastava na trećem ciklusu studija se izvodi na engleskom jeziku izuzev Odsjeka za orijentalnu filologiju na kojem se nastava izvodi na turskom jeziku.
- (2) Da bi student mogao pohađati nastavu, mora imati određeni nivo znanja iz engleskog jezika, odnosno turskog jezika na Odsjeku za orijentalnu filologiju.
- (3) Nivo znanja engleskog odnosno turskog jezika kandidata ocjenjuje se prema rezultatu ispita iz poznavanja predmetnog jezika ili ekvivalentnim rezultatima postignutim na drugim ispitima iz poznavanja predmetnog jezika koje odredi Senat Univerziteta.
- (4) Za upis na naučni stepen doktora, Senat Univerziteta utvrđuje prihvatljiv rezultat postignut na ovim ispitima.

Član 5.
(Postupak upisa)

- (1) Za provođenje postupka rangiranja vijeće imenuje posebnu komisiju koja sačinjava preliminarnu listu primljenih kandidata i izvještaj o rezultatima upisa dostavlja vijeću.
- (2) Preliminarna lista se objavljuje na oglasnoj ploči fakulteta najkasnije dva dana od posljednjeg dana polaganja prijemnog ispita/intervjua, a na istu zainteresirani kandidati imaju pravo prigovora u roku od tri dana.
- (3) Vijeće donosi odluku po prigovoru u roku od tri dana, te dostavlja listu primljenih kandidata Senatu Univerziteta radi usvajanja konačne liste.
- (4) Kandidati sa istim brojem bodova imaju jednako pravo upisa.
- (5) Konačna lista primljenih kandidata objavljuje se na oglasnoj ploči Univerziteta, odnosno fakulteta najkasnije dva dana nakon isteka roka za donošenje odluke po izjavljenom prigovoru.
- (6) Kandidat koji je ostvario pravo na upis, a u predviđenom roku nije izvršio upis, gubi pravo upisa, a umjesto njega pravo na upis stiže sljedeći kvalifikovani kandidat na rang listi.
- (7) Rektor Univerziteta dostavlja nadležnom Ministarstvu spisak svih upisanih studenata u prvu godinu studija na nivou Univerziteta najkasnije sedam dana prije početka studijske godine.

Član 6.
(Ugovor o studiranju)

Student sa Univerzitetom zaključuje ugovor o studiranju, kojim se bliže uređuju njihova međusobna prava i obaveze.

Član 7.
(Upis stranih državljana)

Strani državljanima imaju pravo upisa na studij trećeg ciklusa pod jednakim uslovima kao i državljani Bosne i Hercegovine u skladu sa Zakonom.

IV UPIS PUTEM PRIJELAZA

Član 8.
(Upis putem prijelaza)

- (1) Studentu koji je trenutno upisan na naučni stepen doktora na nekoj drugoj visokoškolskoj ustanovi u Bosni i Hercegovini ili inostranstvu, po dostavljanju svih potrebnih dokumenata, može se odobriti prijelaz samo na isti ili srodan studijski program.
- (2) Studentu koji prelazi na Internacionalni Burč univerzitet sa drugog univerziteta mora se organizovati ispit iz znanja engleskog jezika (osim ukoliko priloži prihvatljiv dokaz o poznavanju engleskog jezika o čemu odlučuje vijeće), odnosno turskog jezika ukoliko se upisuje na Odsjek za orijentalnu filologiju.
- (3) Prijelaz odobrava dekan, a na osnovu odluke vijeća na način utvrđen ovim Pravilima, Statutom i drugim općim aktima Univerziteta.
- (4) Studenti koji su trenutno upisani na naučni stepen doktora na jednom od studijskih programa Univerziteta imaju mogućnost da slobodno izaberu neki drugi studijski program koji vodi do

naučnog stepena doktora, pod uslovima koje odredi vijeće fakulteta.

- (5) Studenti koji su upisani na redovan studij u okviru trećeg ciklusa studija, imaju mogućnost prijelaza na studij na daljinu (u daljem tekstu: DL studij) u okviru istog studijskog programa i obratno, uz ispunjavanje proceduralnih i finansijskih uslova za prijelaz.
- (6) Prijelaz iz stava (6) ovog člana odobrava dekan fakulteta na zahtjev studenta.

Član 9. (Priznavanje ispita)

- (1) Studentu koji je položio ispit na drugom studijskom programu priznaje se polozeni ispit, ako predmet iz kojeg je ispit položen, po svojoj sadržini i obimu odgovara predmetu koji je student upisao, što se dokazuje dokumentima predviđenim ECTS pravilima.
- (2) Ako predmet iz kojeg je ispit položen po svojoj sadržini i obimu približno odgovara predmetu koji je student upisao, nastavnik može priznati ispit u cjelini ako je ocijenio da je student kroz obrađeni i polozeni program stekao znanje i vještine u mjeri dovoljnoj za priznavanje ispita.
- (3) Priznavanjem ispita priznaje se i ocjena kojom je student ocijenjen na ispitu.
- (4) Broj bodova priznatog ispita utvrđuje se u skladu sa pravilima ECTS i važećim nastavnim planom i programom studenta.
- (5) Ako postoji znatna razlika u nastavnim planovima i programima položenih predmeta, utvrđuje se odgovarajuća razlika predmeta ili dijela predmeta koje je student dužan položiti.
- (6) Student je dužan da u daljem školovanju na Univerzitetu položi utvrđenu razliku ispita i da stekne broj kredita/bodova predviđenih za upis u narednu godinu studija u skladu sa odredbama ovih Pravila.

Član 10. (Upis na pripremni program iz engleskog jezika)

- (1) Kandidati za koje se utvrdi da ispunjavanju uslove za upis na treći ciklus studija, ali nisu uspjeli položiti ispit iz poznavanja engleskog jezika ili nisu polagali ispit iz znanja engleskog jezika, upućuju se na usavršavanje koje organizuje Pripremna škola engleskog jezika.
- (2) Po završetku usavršavanja, kandidati su obavezni položiti ispit iz poznavanja engleskog jezika u okviru Pripremne škole ili ekvivalentni ispit u drugoj instituciji koja organizira takve vidove usavršavanja, a o čijoj prihvatljivosti odlučuje vijeće.

V ORGANIZACIJA I IZVOĐENJE TREĆEG CIKLUSA STUDIJA

Član 11. (Organizacija)

- (1) Treći ciklus studija okvirno se sastoji iz:
 - a) definiranja nastavnog plana i programa,
 - b) izbora naučne/umjetničke oblasti u okviru koje će se raditi doktorska disertacija i izbora mentora,
 - c) pohađanja nastave i praćenja vrednovanja rezultata kroz utvrđene provjere znanja,
 - d) prijave i prezentacije izabrane teme, pristupa i naučnog metoda doktorske disertacije,
 - e) plana i prezentiranja napredovanja izrade doktorske disertacije,

- f) naučnoistraživačkog i praktičnog rada na izradi doktorske disertacije,
 - g) javne odbrane doktorske disertacije i
 - h) objavljivanja dijelova istraživanja/naučnih radova povezanih sa istraživanjem u referentnim časopisima.
- (2) Univerzitet, odnosno fakulteti organizuju i realizuju treći ciklus studija iz oblasti za koje su matični.
 - (3) Studij trećeg ciklusa se organizuje u punom fondu sati predviđenim nastavnim planom i programom kao redovni studij i kao DL studij.

Član 12. **(Izvođenje nastave)**

- (1) Nastavni proces trećeg ciklusa studija izvodi se kroz predavanja, seminare, konsultacije i druge utvrđene oblike nastave.
- (2) Predavanja se organiziraju ako je u okviru određenog studijskog programa registrovano tri ili više studenata.
- (3) Ukoliko određeni predmet sluša manje od tri studenta ili priroda studija to dozvoljava, Univerzitet može organizirati konsultativnu ili mentorsku nastavu.
- (4) Odluku o načinu izvođenja nastave donosi vijeće.
- (5) U pravilu, nastava i ispiti trećeg ciklusa studija organiziraju se u prvom i drugom semestru, dok su treći, četvrti, peti i šesti semestar predviđeni za naučnoistraživački rad, izbor teme i mentora, plan i prezentiranje napredovanja na disertaciji i odbranu doktorske disertacije.

VI STUDIJ NA DALJINU – DL STUDIJ

Član 13. **(Organizacija studija)**

- (1) DL studij je formaliziran sistem edukacije studenata kojim se korištenjem računarskih tehnologija i interaktivnih nastavnih materijala osigurava pristup nastavnim procesima.
- (2) Studij trećeg ciklusa može se organizirati kao DL studij u fondu sati prilagođenom studentima koji nisu u mogućnosti pohađati redovni studij.
- (3) Kada se nastava odnosno pojedini oblici nastave organiziraju u formi DL studija, ispiti se obavezno održavaju u sjedištu fakulteta, odnosno Univerziteta.
- (4) Naučna istraživanja u okviru doktorskih programa koja su sastavni dio nastave, mogu se organizirati i realizirati u sjedištu Univerziteta ili na mjestu njihove realizacije.
- (5) Doktorska disertacija u okviru DL studija se brani u sjedištu fakulteta. Izuzetno, vijeće može odobriti odbranu disertacije putem video/internet veze.
- (6) Da bi vijeće odobrilo organiziranje odbrane doktorske disertacije putem video/internet veze, potrebno je da student priloži zahtjev, pismeno odobrenje mentora, te dokaze koji opravdavaju takav način odbrane.
- (7) Pored uslova iz prethodnog stava, student mora ispuniti sve proceduralne i finansijske obaveze prema Univerzitetu.

VII ZAJEDNIČKI I INTERDISCIPLINARNI STUDIJSKI PROGRAMI

Član 14.

(Organizacija zajedničkog ili interdisciplinarnog studija)

- (1) Univerzitet može organizovati i izvoditi studij drugog ciklusa iz jedne ili više naučnih/umjetničkih oblasti, na dva ili više fakulteta Univerziteta ili zajedno sa drugom visokoškolskom ustanovom iz zemlje ili inostranstva (zajednički ili interdisciplinarni studijski program) u skladu sa Zakonom.
- (2) Zajednički ili interdisciplinarni studijski program mogu organizovati fakulteti iz naučnih/umjetničkih oblasti za koje su matični.
- (3) U organizaciji studija iz prethodnog stava, Univerzitet može realizirati program za sticanje dvojnih ili zajedničkih diploma.
- (4) Prijedlog o organizovanju zajedničkog ili interdisciplinarnog studijskog programa pokreće vijeće fakulteta.
- (5) Za realizaciju zajedničkog ili interdisciplinarnog studija Senat Univerziteta usvaja prethodno mišljenje, te pribavlja saglasnost nadležnog Ministarstva.
- (6) Predlagači zajedničkog ili interdisciplinarnog studija utvrđuju program, koji je usvojen od strane nadležnih tijela svih učesnika u programu.

Član 15.

(Ugovor o realizaciji zajedničkog/interdisciplinarnog studija)

- (1) Program realizacije studija iz prethodnog člana uređuje se posebnim ugovorom kojim se, između ostalog, regulišu sljedeća pitanja:
 - a) uvjeti i načini realizacije nastave,
 - b) akademska titula i stručno zvanje/zvanja koja se stiču nakon završetka studija,
 - c) cijena studija,
 - d) sadržaj i izgled diplome,
 - e) procedure odobravanja i odbrane završnog rada,
 - f) korištenje prostora i opreme,
 - g) uvjeti sticanja i raspoređivanja sredstava,
 - h) rukovođenje studijem,
 - i) kod koga će se voditi evidencija o studentu (upis, izdavanje uvjerenja, diploma i sl.),
 - j) druga prava i obaveze organizatora zajedničkog ili interdisciplinarnog studijskog programa.

VIII VREDNOVANJE RADA STUDENATA

Član 16.

(Postupak provjere znanja)

- (1) Studenti moraju sredinom semestra polagati ispit i/ili završiti druge zadane projekte/domaće zadatke tokom semestra, a pored toga moraju polagati i završni ispit i/ili kompletirati završni projekt radi ocjene iz određenog predmeta.
- (2) Datumi završnih ispita određuju se akademskim kalendarom za svaku studijsku godinu.

- (3) Završnu ocjenu studentima daje predmetni nastavnik.
- (4) Završna ocjena se bazira na ocjenama svih oblika provjere znanja u skladu sa silabusom svakog pojedinačnog predmeta.

Član 17.
(Ocjenjivanje)

- (1) Univerzitet primjenjuje sljedeći sistem ocjenjivanja:

| <i>Procenat/Broj bodova</i> | <i>Slovnna ocjena iz predmeta</i> | <i>Brojčana ocjena iz predmeta</i> |
|-----------------------------|-----------------------------------|------------------------------------|
| <i>95-100</i> | <i>A</i> | <i>10</i> |
| <i>85-94</i> | <i>B</i> | <i>9</i> |
| <i>75-84</i> | <i>C</i> | <i>8</i> |
| <i>65-74</i> | <i>D</i> | <i>7</i> |
| <i>55-64</i> | <i>E</i> | <i>6</i> |
| <i>54 i niže</i> | <i>F</i> | <i>5</i> |

- (2) Za pojedine predmete predviđene nastavnim planom i programom ocjenjivanje i vrednovanje studenata se može izraziti slovnim ocjenama (P – položio i N – nije položio).
- (3) Odluku o ocjenjivanju studenata u skladu sa odredbom iz prethodnog stava donosi Senat na prijedlog vijeća.

Član 18.
(Prosjek ocjena)

- (1) Prosjek ocjena studenta računa se korištenjem ponderirane aritmetičke sredine svih ocjena u toku ciklusa studija.
- (2) Sve ocjene se prikazuju na transkriptu/uvjerenju o položenim ispitima studenta.

IX GUBITAK STATUSA STUDENTA

Član 19.
(Razlozi za prestanak statusa studenta)

Status studenta prestaje iz sljedećih razloga:

- a) okončanjem ciklusa studija,
- b) ispisom sa Univerziteta,
- c) isključenjem po postupku i uz uslove utvrđene Zakonom, Statutom ili drugim odgovarajućim aktom Univerziteta,
- d) ukoliko student ne izvrši upis i ovjeru semestra dva puta zaredom,
- e) ako prijedlog završnog rada studenta bude odbačen od strane nadležne komisije dva puta,
- f) ako studenti ne završe studijski program u predviđenom roku,
- g) iz drugih razloga predviđenih aktima Univerziteta.

X TRAJANJE TREĆEG CIKLUSA STUDIJA

Član 20. (Organizacija studijske godine)

- (1) Treći ciklus studija traje tri studijske godine (šest semestara) i vrednuje se sa 180 ECTS studijskih bodova.
- (2) Svaki semestar se vrednuje sa 30 ECTS studijskih bodova.
- (3) Broj studijskih bodova za pojedini predmet određuje se prema ukupnom opterećenju studenta (teorijska i/ili praktična nastava, vježbe, seminari, naučnoistraživački rad, učešća na konferencijama i sl.), vremenu rada studenta na samostalnim zadacima (domaći zadaci, projekti, seminarski radovi i sl.) i vremenu za učenje kod pripreme za provjeru znanja i ocjenjivanja (testovi, završni ispit i sl.).
- (4) Struktura doktorskog studija u pravilu uključuje:
 - a) najmanje osam predmeta u prvoj godini studija vrijednosti 60 ECTS bodova,
 - b) prijedlog teme doktorske disertacije,
 - c) najmanje dva kontrolna ispitivanja disertacije i
 - d) doktorske disertacije.

Član 21. (Međunarodna razmjena studenata)

- (1) Student ima pravo da u toku studija provede određeno vrijeme (semestar ili studijsku godinu) na srodnoj ustanovi visokog obrazovanja u zemlji ili inostranstvu, posredstvom međunarodnih programa za razmjenu studenata, na osnovu bilateralnih ugovora koje zaključuje Univerzitet ili na prijedlog studenta po prethodno pribavljenoj saglasnosti Univerziteta.
- (2) Načini provođenja mobilnosti studenata utrađuju se posebnim aktom.

XI USLOVI ZA PREDMETNOG NASTAVNIKA NA DOKTORSKOM STUDIJU

Član 22. (Opći uslovi)

- (1) Predmetni nastavnik na doktorskome studiju može biti nastavnik u svim zvanjima (docent, vanredni profesor i redovni profesor).
- (2) Kao predmetni nastavnik može biti angažovan i vanjski saradnik i gostujući profesor.
- (3) Stručnjaci iz prakse mogu sudjelovati u realizaciji dijela nastave na doktorskome studiju, ali ne mogu imati status nosioca predmeta.
- (4) Mentor na doktorskome studiju može biti nastavnik u svim zvanjima (docent, vanredni profesor i redovni profesor).

XII IMENOVANJE MENTORA I KOMISIJE ZA ODBRANU PRIJEDLOGA TEME I NADZOR IZRADE DOKTORSKE DISERTACIJE

Član 23. (Uslovi za mentora)

- (1) Mentor se imenuje iz reda nastavnika zaposlenih na Univerzitetu ili na drugoj visokoškolskoj ustanovi u zvanjima docent, vanredni ili redovni profesor iz naučne oblasti iz koje se radi doktorska disertacija.
- (2) Mentor je dužan da pomaže studentu pri izboru metoda naučnoistraživačkog rada, literature, pripremi strukture rada, kao i da mu pruža stručnu pomoć.
- (3) Ako predmet teme doktorske disertacije zahtijeva više od jednog mentora, mogu se imenovati dva mentora od kojih je jedan obavezno predmetni nastavnik iz naučne/umjetničke oblasti iz koje se brani doktorska disertacija.
- (4) U slučaju ukazane potrebe vijeće može donijeti odluku o zamjeni mentora.

Član 24. (Postupak imenovanja)

- (1) U toku trećeg semestra student vijeću predlaže mentora i temu doktorske disertacije, uz uslov da je položio sve ispite predviđene nastavnim planom i programom.
- (2) Prijedlog teme doktorske disertacije potpisuju student i mentor kojeg student predlaže.
- (3) Vijeće donosi odluku o imenovanju mentora, te podnosi Senatu prijedlog odluke o imenovanju komisije za odbranu prijedloga teme i nadzor izrade doktorske disertacije na konačno odlučivanje.
- (4) Komisija iz prethodnog stava se sastoji od 3 člana.
- (5) O eventualnim izmjenama komisije za odbranu prijedloga teme i nadzor izrade doktorske disertacije odlučuje vijeće.

XIII ODBRANA PRIJEDLOGA DOKTORSKE DISERTACIJE

Član 25. (Postupak)

- (1) Odmah po imenovanju komisije za odbranu prijedloga teme i nadzor izrade doktorske disertacije, studentu se daje rok od najduže tri mjeseca za odbranu prijedloga teme disertacije pred komisijom.
- (2) Komisija iz prethodnog stava podnosi vijeću izvještaj o odbrani prijedloga teme, a na osnovu izvještaja vijeće donosi konačnu odluku o odobravanju ili odbijanju teme doktorske disertacije.
- (3) Student čiji je prijedlog odbijen ima pravo zahtijevati novog mentora, te novu temu doktorske disertacije u roku od tri mjeseca od dana kada je vijeće donijelo odluku o odbijanju prijedloga.

XIV OCJENA NAPRETKA IZRADE DOKTORSKE DISERTACIJE

Član 26. (Postupak)

- (1) Nakon što je kandidatu od strane vijeća odobrena tema doktorske disertacije, komisija za odbranu

prijedloga teme i nadzor izrade doktorske disertacije će se sastati najmanje dva puta prije odbrane (u pravilu jednom po semestru), a u cilju ispitivanja napretka izrade disertacije.

- (2) Prije svakog ispitivanja napretka izrade doktorske disertacije, student podnosi mentoru pisani izvještaj o napretku izrade disertacije radi utvrđivanja spremnosti studenta da brani navedeni izvještaj pred komisijom. Ukoliko komisija ocijeni izvještaj pozitivnim, mentor će dostaviti izvještaj sekretaru organizacione jedinice (u daljem tekstu: sekretar) u cilju zakazivanja datuma odbrane napretka izrade disertacije. Izvještaj se brani pred komisijom nakon proteka najmanje sedam dana od dana dostavljanja istog sekretaru.
- (3) Izvještaj o napretku izrade doktorske disertacije sadrži sažetak do tada napisanog dijela disertacije, te plan rada za naredni semestar. Komisija za nadzor daje ocjenu U (uspješan) ili N (neuspješan).
- (4) Prije podnošenja zahtjeva za ocjenu i odbranu doktorske disertacije, student mora najmanje dva puta dobiti ocjenu U – uspješan. Ukoliko student dva puta uzastopno bude ocijenjen kao neuspješan, komisija će vijeću predložiti da odbije prijedlog teme doktorske disertacije. U tom slučaju, student ima pravo predložiti imenovanje novog mentora i novu temu doktorske disertacije uz poštivanje roka propisanog u čl. 25. stav (3) ovih Pravila.
- (5) Ukoliko je student podnio zahtjev za promjenu teme doktorske disertacije, a prije podnošenja zahtjeva je uspješno odbranio dva izvještaja o napretku izrade disertacije, komisija za odbranu prijedloga teme i nadzor izrade doktorske disertacije se mora sastati još najmanje jednom u cilju ispitivanja napretka disertacije. Izuzetno, ukoliko se radi o promjeni naslova teme koji ne utiče na sadržaj ili suštinu doktorske disertacije, komisija može odlučiti da ispitivanje doktorske disertacije nije neophodno.
- (6) Ako je po zahtjevu studenta tema doktorske disertacije u potpunosti ili najvećem dijelu promijenjena, vijeće može predložiti Senatu imenovanje nove komisije za odbranu prijedloga teme i nadzor izrade doktorske disertacije. Imenovanje nove komisije nije neophodno ukoliko je većina članova prethodno imenovane komisije iz naučne oblasti nove teme doktorske disertacije.
- (7) Prilikom posljednjeg ispitivanja disertacije, članovi komisije u saradnji sa Uredom za publikacije utvrđuju da je disertacija spremna za odbranu, da nije plagijat, da je metodološki ispravno koncipirana, te da ne postoji potreba za izmjenama ili korekcijama u radu.
- (8) Odbrana prijedloga teme, te odbrana izvještaja o napretku doktorske disertacije organiziraju se u sjedištu fakulteta. Izuzetno, vijeće može, na obrazložen zahtjev studenta i pismenu saglasnost mentora, odobriti odbranu prijedloga teme i odbranu izvještaja o napretku izrade disertacije putem video/internet veze.

XV ODBRANA DOKTORSKE DISERTACIJE

Član 27.

(Obaveza objavljivanja članaka/naučnih radova)

- (1) Studenti koji uspješno polože predmete predviđene nastavnim planom i programom obavezni su napisati doktorsku disertaciju na engleskom jeziku (uz izuzetak Odsjeka za orijentalnu filologiju – smjer turski jezik i književnost, na kojem se disertacija piše na turskom jeziku).
- (2) Student dokorskog studija obavezan je objaviti članke u naučnim indeksiranim časopisima samostalno ili u saradnji (koautorstvu) sa svojim mentorom, a koji su u vezi sa doktorskom disertacijom, i nakon toga odbraniti disertaciju pred komisijom za ocjenu i odbranu doktorske disertacije.
- (3) Minimum objavljenih članaka u međunarodnim indeksiranim časopisima je sljedeći:

- a) Fakultet za inženjering i prirodne nauke:
 - dva članka u koautorstvu s mentorom od kojih najmanje jedan treba biti objavljen u međunarodnim indeksiranim časopisima SSCI ili SCI/SCI-prošireni indeks, sa izuzetkom Odsjeka za arhitekturu gdje je neophodno da najmanje jedan članak bude objavljen u indeksiranom časopisu AHCI, Avery Index ili DAAI (također u koautorstvu s mentorom).
- b) Fakultet za edukaciju i humanističke nauke:
 - dva članka u koautorstvu s mentorom od kojih najmanje jedan treba biti objavljen u međunarodnim indeksiranim časopisima SSCI ili SCI/SCI-prošireni indeks.
- c) Fakultet za ekonomiju i društvene nauke:
 - najmanje jedan članak objavljen u međunarodnim indeksiranim časopisima SSCI (u koautorstvu sa mentorom).

Član 28.

(Imenovanje komisije za ocjenu i odbranu doktorske disertacije)

- (1) Po završetku doktorske disertacije, student podnosi sekretaru fakulteta pismeni zahtjev za zakazivanje ocjene i odbrane doktorske disertacije. Uz zahtjev, dostavljaju se i dokazi o objavljenim/prihvaćenim člancima, izvještaj iz službene evidencije o položenim ispitima i ECTS bodovima, te dovoljan broj primjeraka disertacije (nekoričenih).
- (2) Student dostavlja jedan primjerak doktorske disertacije u elektronskoj formi Uredu za publikacije sa ciljem provjere da li se radi o plagijatu. Detaljna procedura u vezi plagijata uređuje se posebnim aktom Ureda za publikacije.
- (3) Dokumentacija iz stava (1) ovog člana dostavlja se komisiji za ocjenu i odbranu doktorske disertacije, zajedno sa odlukom o imenovanju ove komisije.
- (4) Komisiju za ocjenu i odbranu doktorske disertacije imenuje Senat na prijedlog vijeća najkasnije 30 dana od dana podnošenja urednog zahtjeva sekretaru. Komisija se sastoji od 3 do 5 članova, od kojih najmanje jedan član može biti imenovan sa drugog univerziteta. Mentor je član komisije po položaju. Izuzetno, ako član komisije sa drugog univerziteta ili neki drugi član budu spriječeni da prisutvuju odbrani disertacije, izuzev mentora čije prisustvo je obavezno, kao član komisije može se pojaviti zamjenski član koji je imenovan u odluci Senata.
- (5) Sekretar fakulteta je član komisije po položaju (bez prava glasa), sa zadatkom za obavljanje administrativno-tehničkih aspekata odbrane doktorske disertacije.
- (6) Komisija je dužna da sačini i dostavi izvještaj o doktorskoj disertaciji (kratki prikaz disertacije: postavljeni ciljevi, primijenjene metode, dobiveni rezultati i zaključci o realizovanim istraživanjima) vijeću u roku od 30 dana od dana prijema disertacije. Prilikom pregleda disertacije, komisija može istu vratiti studentu na doradu i dopunu, te odrediti rok (koji ne može biti kraći od 20 dana niti duži od 2 mjeseca) u kojem tu obavezu treba izvršiti. Ukoliko komisija ocijeni da doktorska disertacija ni nakon dorade i dopune ne ispunjava kriterije potrebne za odbranu iste, predložit će vijeću da odbije doktorsku disertaciju. U tom slučaju, student može podnijeti prijedlog nove teme doktorske disertacije u roku od 30 dana od dana prijema odluke o odbijanju.
- (7) Nakon prijema izvještaja komisije, vijeće predlaže Senatu donošenje odluke o izvještaju komisije i prihvatanju ili neprihvatanju doktorske disertacije.
- (8) Konačnu odluku o izvještaju komisije za ocjenu i odbranu doktorske disertacije donosi Senat u roku od 30 dana od dana prijema izvještaja komisije. Ako Senat Univerziteta ne prihvati izvještaj komisije, student može izvršiti ispravke disertacije u skladu sa primjedbama u roku ne dužem od 30 dana. Ukoliko Senat ocijeni da doktorska disertacija ni nakon dorade i dopune ne ispunjava kriterije

potrebne za odbranu iste, donijet će odluku o odbijanju doktorske disertacije. U tom slučaju, student može podnijeti prijedlog nove teme doktorske disertacije u roku od 30 dana od dana prijema odluke o odbijanju.

- (9) Ukoliko Senat prihvati izvještaj komisije, student može pristupiti odbrani doktorske disertacije po isteku najmanje 15 dana od dana donošenja odluke o usvajanju izvještaja komisije da je student uspješno izradio doktorsku disertaciju. Odluka o usvajanju izvještaja i datumu odbrane doktorske disertacije dostavlja se studentu i objavljuje na oglasnoj tabli i internet stranici fakulteta.
- (10) Ako student ne zadovolji na odbrani doktorske disertacije, još jednom ima pravo na odbranu iste doktorske disertacije ili da zatraži da mu se odobri izbor nove teme. Odluku o zahtjevu kandidata za promjenu mentora odnosno teme doktorske disertacije donosi Senat na prijedlog vijeća.
- (11) Ukoliko se odbrana doktorske disertacije sastoji od praktičnog i usmenog ispita, student prvo obavlja praktični dio, a zatim usmenu odbranu pismenog dijela doktorske disertacije.
- (12) Na kraju ispita, komisija će bez prisustva javnosti donijeti jednu od sljedećih odluka: odobreno, odbijeno, ili ponavljanje odbrane.
- (13) Kandidat čija disertacija je ocijenjena sa odlukom odbijeno može ponovno aplicirati sa novom disertacijom u roku od 1 (jedne) godine nakon odbijanja disertacije, dok kandidat čija disertacija je ocijenjena odlukom ponavljanje odbrane može ponovno aplicirati za odbranu iste u periodu od 3 (tri) mjeseca po donošenju odluke komisije. U oba slučaja, Senat na prijedlog vijeća, a na zahtjev studenta, imenuje novu komisiju za ocjenu i odbranu doktorske disertacije.
- (14) Student za čiju disertaciju komisija dva puta donese odluku odbijeno gubi status studenta.
- (15) Ukoliko student ne odbrani doktorsku disertaciju u tekućoj akademskoj godini, dužan je izvršiti registraciju semestra u novoj akademskoj godini. Izuzetno, ukoliko je student pravovremeno podnio zahtjev za ocjenu i odbranu doktorske disertacije, vijeće može odobriti odbranu i nakon završetka tekuće akademske godine.
- (16) Odbrana doktorske disertacije je javna.
- (17) Nakon uspješne odbrane, doktorska disertacija se predaje u pet primjeraka, ukoričenih u tvrde korice.

XVI ISPRAVE I EVIDENCIJE O STUDIJU

Član 29. (Diploma)

- (1) Student koji je položio sve ispite predviđene studijskim programom trećeg ciklusa studija, odbranio doktorsku disertaciju i ispunio sve ostale obaveze propisane Statutom Univerziteta i ovim Pravilima, stiče akademsku titulu i naučno zvanje doktora nauka/umjetnosti, odnosno diplomu završenog trećeg ciklusa studija.
- (2) Uz diplomu se obavezno izdaje i dodatak diplomi radi detaljnog uvida u nivo, prirodu, sadržaj, sistem i pravila studiranja i postignute rezultate tokom studija.
- (3) Do dodjeljivanja diplome, izdaje se uvjerenje o završenom trećem ciklusu studija u kojem se navodi da je privremenog karaktera.
- (4) Senat Univerziteta utvrđuje datum svečane promocije dodjele diploma o završenom trećem ciklusu studija.
- (5) Student koji odbrani doktorsku disertaciju upisuje se u matičnu knjigu u skladu sa Zakonom i Statutom.

XVII PRELAZNE I ZAVRŠNE ODREDBE

Član 30. (Primjena drugih propisa)

Na druga pitanja vezana za organizaciju nastave i način nastavnog rada, te za prava i obaveze studenta tokom studija, a koja nisu regulisana ovim Pravilima, primjenjivat će se Statut Univerziteta i Pravila studiranja za prvi i drugi ciklus studija.

Član 31. (Stupanje na snagu)

Pravila stupaju na snagu danom donošenja, a primjenjivat će se počev od studijske 2018/2019. akademske godine.

Sarajevo, 29.08.2018.
Broj: 01-204-2/18

Predsjedavajući Senata
Prof. dr. Damir Marjanović

Dostavljeno:
3x Fakulteti
1x www.ibu.edu.ba
1x a/a